

為。」又云。「誰從此大畏。能善救護我。睜其恐懼眼。四方覓皈依。見四方無依。次乃遍迷悶。彼處非有依爾時我何為。故自今皈依諸佛眾生怙勤救眾生事。大力除諸畏。」此僅粗分。廣如念住經說。定須觀閱數數觀閱於所觀閱應當思惟。

第二習近後世安樂方便分二。一趣入聖教最勝之門淨修皈依。<sup>二</sup>一切善樂所有根本發深忍信。初中分四。一由依何事為皈依因。<sup>三</sup>由依彼故所皈之境。<sup>三</sup>由何道理而正皈依。<sup>四</sup>既皈依已所學次第。今初

因雖多種。然於此中是如前說。於現法中速死不住。死歿之後。於所生處亦無自在。是為諸業他自在轉。其業亦如入行論云。「如黑暗依陰雲中。剎那電閃極明顯。如是佛力百道中。世間福慧略發起。由是其善唯羸劣。恆作重罪極強猛。」諸白淨業勢力微劣。諸黑惡業至極強力。故墮惡趣。由思此理。起大畏怖。次令發生求依之心。猶如陳那菩薩云。「安住無邊底。生死大海中。貪等極暴惡。大鯨嚼其身。今當皈依誰。」總為二事。由惡趣等自生怖畏。深信三寶。有從彼中救護堪能。故若此二唯有虛言。則其皈依亦同於彼。若此二因堅固。猛利。則其皈依亦能變意。故應勵力勤修二因。

第二由依彼故所皈之境分二。一正明其境。二應皈依此之因相。 今初

如百五十頌云。「若誰一切過畢竟皆永無。若是一切種。一切德依處。設是有心者。即應皈依此。讚此恭敬此。應住其聖教。」謂若有一能辨是依非依慧者。理應皈依。無欺皈處佛薄伽梵。由此亦表法及僧寶。如皈依七十頌云。「佛法及僧伽。是求脫者依。」

應皈之因相分四。初者。謂自即是極調善性。已能證得無畏位故。若未得此。則如倒者依於倒者。不能從其一切畏中救護他故。第二者。謂於一切種度所化機。善方便故。此若無者。縱往皈依。亦不能辦所求事故。第三者。謂具大悲故。此若無者。雖趣皈依。不救護故。第四者。謂以一切財而興供養。未將為喜。要以正行而修供養。乃生喜故。此若無者。則定顧視先有恩惠。不與一切作皈處故。總之自正解脫。一切怖畏。善巧於畏度他方便。普於一切無其親疏。大悲遍轉。普利一切有恩無恩。是應皈處。此亦唯佛方有。非自在天等。故佛即是所皈依處。由如是故。佛所說法。佛弟子眾皆可皈依。由是若於攝分所說此諸理上。能引定解。專心依仰。必無不救。故應至心發起定解。由能救自二種因。中外支或因。無所缺少。大師已成。然是內支。未能實心持為皈依。而苦惱故。是故應知。雖未請求。由大悲引。而作助伴。復無懈怠。

無比勝妙真皈依處。現前安住為自作怙。故應皈此。讚應讚云。「自宣我是汝。無怙者助伴。由大悲抱持。一切諸眾生。大師具大悲。有愍願哀愍。勤此無懈怠。有誰與尊等。汝是諸有情。依怙總勝親。不求尊為依。故眾生沈溺。若正受何法。下者亦獲利。能利他諸法。除尊非餘知。一切外支力。尊已正成辦。由內力未全。愚夫而受苦。」

第三由何道理而皈依者。攝決擇中略說四事。一知功德。二知差別。三自誓受。四不言有餘而正皈依。初知功德而皈依者。須能憶念皈處功德。其中有三。一佛功德。二法功德。三僧功德。今初

分四

身功德者。謂正思念諸佛相好。此亦應如喻讚所說而憶念之。如云。「相莊嚴尊身。殊妙眼甘露。如無雲秋空。以星聚莊嚴。能仁具金色。法衣端嚴覆。等同金山頂。為霞雲縛纏。尊怙無嚴飾。面輪極光滿。離雲滿月輪。亦莫能及此。尊口妙蓮花。與蓮口開放。蜂見疑蓮華。當如懸索轉。尊面具金色。潔白齒端嚴。如淨秋月光。照入金山隙。應供尊右手。為輪相殊飾。由以手安慰。生死所怖人。能仁遊行時。雙足如妙蓮。印畫此地上。蓮華何能嚴。」

語功德者。謂隨世界所有有情。同於一時。各各申一異類請問。能由剎那心相應慧。悉

皆攝持。以一言音答一切問。彼等亦能各隨自音。而生悟解。應思惟此希有道理。如諦者品云。「若諸有情於一時。發多定語而請問。一剎那心遍證知。由一音酬各各問。由是應知勝導師宣說梵音於世間。此能善轉正法輪。盡諸人天苦邊際。」又如百五十頌云。「觀尊面可愛。從彼聞此等。極和美言音。如月注甘露。尊語能靜息貪塵。如雨雲拔除瞋毒蛇。等同妙翅鳥。摧壞極無知。翳障如日光。由摧我慢山。故亦等金剛。見義故無敗。無過故隨順。善綴故易解。尊語具善說。且初聞尊語。能奪聞者意。次若正思惟。亦除諸貪癡。慶慰諸匱乏。亦放逸者皈。令樂者厭離。尊語相稱轉。能生智者喜。能增中者慧。能摧下者翳。此語利眾生。」應如是念。

意功德分二。智功德者。謂於如所有性。盡所有性。一切所知。如觀掌中菴摩洛迦。智無礙轉。能仁智遍。一切所知。除佛餘者。所知寬廣。智量狹小。悉不能遍。如讚應讚云。「唯尊智能遍。一切所知事。除尊餘一切。唯所知寬廣。」又云。「世尊墮時法。一切種生本。如掌中酸果。是尊意行境。諸法動非動。若一若種種。如風行於空。尊意無所礙。」應如是念。悲功德者。如諸有情為煩惱縛。無所自在。能仁亦為大悲繫縛。無所自在。是故若見諸苦眾生。常起大

悲恆無間斷。如百五十頌云。「此一切眾生惑縛無差別。尊為解眾生煩惱長悲縛。為應先禮尊。為先禮大悲。尊知生死過。令如此久住。」諦者品亦云。「若見癡黑暗。常覆眾生心。陷入生死獄。勝仙發悲心。」又云。「若見欲蔽意。大愛常耽境。墮愛貪大海。勝者發大悲。見煩惑眾生。多病憂逼惱。為除眾苦故。十力生大悲。能仁常起悲。終無不起時。住眾生意樂。故佛無過失。」應隨憶念。

業功德者。謂身語意業。由其任運無間二相。而正饒益一切有情。此復由於所化之別。堪引化者。能仁無不令其所化會遇圓滿。遠離衰損。定作一切所應作事。如百五十頌云。「尊說摧煩惱。顯示魔詔動。說生死苦性。亦示無畏所。思利大悲者。凡能利有情。此事尊未行。豈有此餘事。」讚應讚云。「尊未度眾生。何有是衰損。未令世間會。豈有此盛事。」應憶念之。

此是略說念佛道理。若由種種門中憶念。亦由多門能發淨信。若能數數憶念思惟。則勢猛利常恆相續。餘二寶德。亦復如是。

由如是修。若善了解。則諸經論多是開示三皈功德。此等皆能現為教授。

念觀察修皆是分別。於修行時而棄捨者。是遮此等集聚資糧。淨治罪障非一門徑。故於暇身攝取無量堅實心藏。應當了知為大障礙。此等若作常時修持。心隨修轉。故於初時修心稍難。後時於彼能任運轉。又若能念願我當得如所隨念。如是佛者。是發菩提心。一切晝夜恆得見佛。於臨終時任生何苦。然隨念佛終不退失三摩地。王經云。「教汝應悟解。如人多觀察。由住彼觀察。心能如是趣。如是念能仁。佛身無量智。常能修隨念。心趣注於此。此行住坐時。欣樂善士智。欲我成無上勝世願菩提。」又云。「清淨身語意。常讚佛勝德。如是修心續。晝夜見世依。若時病不安。受其至死苦。不退失念佛苦受。莫能奪。」博朵瓦云。「若數數思。漸能深信。漸淨相續。能得加持。由於此上獲得定解。故能由其誠心皈依。若於所學能正習學。則一切事悉成佛法。吾等對於諸佛妙智。尚不計為準治占卜。」此復說云。「譬如有一準利卜士說云。我知汝於今年無諸災患。則心安泰。彼若說云。今歲有災。應行此事。彼事莫為。則勵力為。若未能辦。心則不安。起是念云。彼作是說。我未能辦。若佛制云。此此應斷。此此應行。豈置心耶。若未能辦。豈憂慮耶。反作是言。諸教法中。雖如彼說。然由現在。若時若處。不能實行。須如是行。輕棄佛語。唯住自知。」若不觀察。隨心愛樂。唯亂於言。若非爾者。

內返其意。詳細觀察。極為諦實。故當數數思佛功德。勵力引發至心定解。此若生者。則於佛所從生之法及修法眾。亦能發起如是定解。是則皈依至於扼要。此若無者。即能轉變心意。皈依。且無生處。況諸餘道。

法功德者。謂由敬佛而為因緣。應作是念。佛具無邊功德者。是由證修滅道二諦。除過引德。以為自性。教證二法。而得生起。如正攝法經云。「諸佛世尊。所有無邊無際功德。從法生起。受行法分。法所化現。法為其主。從法出生。正法行境。依於正法。法所成辦。」

僧功德中。正謂諸聖補特伽羅。此亦由念正法功德。由其如理修行門中。而為憶念。正攝法經云。「於諸僧伽。應如是念。謂說正法。受行正法。思惟正法。是正法田。受持正法。依止於法。供養於法。作法事業。法為行境。法行圓滿。自性正直。自性清淨。法性哀愍。成就悲愍。常以遠離為所行境。恆趣向法。常自淨行。」

由知差別而皈依者。如攝分說。由知三寶內互差別而正皈依。此中分六相。差別者。現正等菩提是佛寶相。即彼證果是法寶相。由他教授而正修行是僧寶相。業差別者。如其次第。善轉教業。斷煩惱苦所緣為業。勇猛增長業。信解差別者。如其次第。應樹親近承事信解。

應樹希求證得信解。應樹和合同一法性共住信解。修行差別者。如其次第。應修供養承事正行。應修瑜伽方便正行。應修共受財法正行。隨念差別者。謂應別念三寶功德。如云。「謂是世尊等。」生福差別者。謂依補特伽羅及法增上。生最勝福。佛及僧二是依初義。此復依一補特伽羅。及依眾多補特伽羅生長福德。以於僧伽定有四故。

由自誓受而皈依者。謂由誓受依佛為師。依般涅槃為正修法。皈依僧伽為修助伴。由如是門而正皈依。如毘奈耶廣釋中說。

由不言餘而皈依者。謂由了知內外大師及其教法。諸學法者。所有勝劣。唯於三寶執為皈處。不執與此相違師等。是所應皈。

此二所有差別之中。師差別者。謂佛圓滿無邊功德。所餘大師與此相違。殊勝讚云。「我捨諸餘師。我皈依世尊。此何故為尊。無過具功德。」又云。「於餘外道教。如如善思惟。如是如是我心信於依怙。如是非遍智宗過壞其心。心壞者不見。無過大師尊。」教差別者。謂佛聖教。由安穩道得安樂果。息生死流。淨諸煩惱。終不欺罔。樂解脫者。唯一善妙。清淨罪惡。外道教法與此相違。如殊勝讚云。「何故由尊教。安樂得安樂。故於說法師。尊教此眾

生。」讚應讚亦云。「謂應趣應遮。清淨及雜染。此是雄尊語。與餘言差別。此純顯真如。彼唯欺罔法。尊語與餘言。除此須何殊。此專一妙善。彼唯障礙法。尊語與餘言。除此有何別。由彼染極染。由此能清淨。此即依怙語。與餘言差別。」僧伽差別由此能知。

第四既皈依已。所學次第分二。攝分中出。教授中出。今初

初中有二四聚。初四聚中。親近善士者。謂如前說。善知識者。乃是一切功德依處。觀見是已而正親近。由皈依佛即是皈依示道大師。隨順此之正行。即是親近示道師故。聽聞正法。及如理作意者。隨其所應。謂當聽聞若佛所說。若佛弟子所說。法教諸契經等。及若作意何種所緣。能息煩惱。即應作意。由皈依法。於教證法應當現證。此即是彼隨順行故。法隨法行者。謂應隨順般涅槃法。而修正行。由皈依僧。於趣涅槃補特伽羅應執為伴。其隨順行。謂應與諸趣解脫者。共同學故。

第二四聚中。諸根不掉者。謂根於境放散之後。意亦隨逐。於境掉動。深見過患。令意厭捨。受學學處者。謂隨力受學佛制學處。悲愍有情者。謂佛聖教。由悲差別。故皈依此。於諸有情。亦應悲愍。斷除損害。應時時間。於三寶所勤修供養者。謂應日日供養三寶。

第二教授中出分二。別學。共學。初中分二。遮止應學。修行應學。今初

如涅槃經云。「若皈依三寶。是謂正近事。終不應皈依諸餘天神等。」皈依正法者。應離殺害心。皈依於僧伽。不共外道住。」此說有三。謂不皈餘天。於諸有情捨離損害。與諸外道不應共住。其中初者謂於世間。若大自在遍入天等。尚不執為畢竟皈處。況諸鬼趣山神龍等。此是不可不信三寶。皈心彼等。若於彼等。請其助伴。現前如法所作事業。則無不可。如求施主為活命伴。依諸醫師為治病伴。第二謂於人及畜等。若打若縛。若禁穿鼻。實不能負強令負等。意樂加行。損害有情。悉應遠離。第三謂與不信三寶。為可歸宿。而毀謗者。不應共住。

三種修行應學者。謂於佛像。若塑若畫。隨好隨醜。不應譏毀。置塵險處。及押當等。不敬輕毀。皆當斷除。應當執為是可敬田。猶如大師。親友書云。「隨工巧拙木造等。智者應供善逝像。」分辨阿笈摩說。劫毘羅摩納婆。由於學無學僧眾。說十八種異類惡語。謂云。「汝等象頭。豈能了知是法非法。」等。感有十八異類頭形摩羯陀魚。自迦葉大師時。乃至釋迦法王住旁生中。雜事中說。拘留孫大師般涅槃後。端妙大王令建大塔。有一工人。曾經二次作是譏云。「今令樹其如是大塔。不知何日乃得完竣。」後善成已。深生憂悔。將其工價造一金鈴。

掛於塔上。其後感生容顏醜惡。身形倭小。聲音和美。名曰善和。故於佛像不應說言。此如此類。於他所造諸佛像等。若因善妙。若量廣大。不應譏毀及遮止等。大瑜伽師奉曼殊像於覺囉前。請觀視云。「此善醜何似。若善妙者。可將絨巴迦格瓦所供之四錢金授與購取。」覺囉答云。「至尊妙音之身。無所不善。師工中等。」說已置頂於一切像。悉如是行。雖於正法四句以上。應離不敬。又應斷除一切不敬。謂抵押經卷。貿為貨物。置禿土地。灰塵險處。鞋襪並持。及跨越等。應起恭敬。等如法寶。傳說僅哦瓦善知識。凡見有持經典來者。合掌起立。後不能起。殷勤合掌。又說覺囉至哦日時。有一咒師不從聞法。大依怙尊見一記錄。以齒污穢沾其經書。深生不忍。說云。「可愍。不可不可。」咒師生信。遂從聞法。霞惹瓦亦云。「我等於法任何玩要。無所不作。然不敬法及法師者。是壞慧因。現在愚蒙。如此已足。莫更作集愚癡之因。若愚過此。更有何能。」

若於僧伽。或出家眾。持沙門相。及於其相。不罵不毀。又一切種不應分黨。視如怨敵。云汝等我等。應當敬重。猶如僧寶。勸發增上意樂會云。「希樂功德住林藪。不應觀察他過失。不應起心作是念。我是超勝我第一。此惰是諸放逸本。永不應輕劣比丘。一劫不能得解脫。」

此是此教正次第。」敦巴仁波卿與大瑜伽師見碎黃布在行路中皆不輕越。抖置淨處。如是行持。應隨修學。自能如何恭敬三寶。則諸眾生亦能如是恭敬。自故如三摩地王經云。「作集如何業。當得如是果。」

共學分六。初者隨念三寶功德差別。數數皈依者。謂數思惟如前所說。內外差別。及三寶中。互相差別。並其功德。

第二隨念大恩恆勤供養。嚼噉之先亦當供養者。如三摩地王經云。「由佛福德獲飲食。愚夫不知報佛恩。」此是以獲飲食為喻。隨自所有有一切樂善。悉應了知是三寶恩。由報恩德意樂供養。此中復二。謂供養事及供養意樂。初中有十。供養身者。謂親供養真佛色身。供養塔者。謂供為佛所建塔等。現前供養者。謂前二事。現自根前而設供養。不現前供養者。謂佛佛塔非現在前。普為一切佛佛塔故而設供養。又若於佛般涅槃後為供佛故。造像及塔。若一數等。亦非現供。若供此二隨一之時。作如是念而供養者。謂此一法性。即是一切法性。是故現前供養此二。亦即供養其餘三世一切諸佛。及供十方無邊佛塔。此是俱供現不現前。論說初者獲廣大福。第二較前獲大大福。第三較前獲最大福。故於一佛或佛像等。修

供養時。應憶法性無所差別。先當遺意供養一切。極為切要。自作供養者。謂非由於懈怠懶惰放逸增上。而令他作。唯自手作。教他供養者。謂念自己略有少物。然諸有情貧苦薄福。無力供養。若教此供。當獲安樂。由悲愍心。唯教他供。又亦勸他共供養者。謂自他俱共同供養。此三福果。大小如前。財敬供養者。謂供種種衣服飲食臥具坐具病緣醫藥。供身什物。薰香末香塗香華鬘伎樂及諸燈燭。敬問禮拜。奉迎合掌。唱種種讚。五支遍禮。右旋圍繞。又供田等無盡奉施。又供摩尼耳環臂釧。諸莊嚴具。下至供養諸小鳴鈴。散諸珍奇。纏寶縷線。供養諸佛。或佛塔廟。廣大供養者。謂以如是利養恭敬常時供養。此復有七。謂所供物眾多微妙。現非現前。自作教他。至心歡喜。猛利勝解。而為供養。復將此善迴向無上正等菩提。非染污供養者。謂不由輕蔑放逸懈怠而教他供。自手供養。殷重供養。不散漫心而設供養。不以貪等雜染供養。不於信佛國王等所為得利敬而為供養。以隨順物而設供養。隨順物者。謂諸淨物。遠離不淨。雌黃所塗。酥所灌洗。局崛羅薰。迦花等及諸所餘非清淨物。

又若如是財物供養。自無所集。無從他求。應於一切世界之中。所有如來諸供養具。以歡喜俱。及於廣大勝解俱心。周遍思惟。一切隨喜少用功力。而修無量廣大供養。攝集菩提。

廣大資糧。恆常於此以真善心。起歡喜心。當勤修學。又如寶雲經及建立三三昧耶經所說。無主攝持諸華果樹及珍寶等。亦當供養。正行供養者。謂於下至搆牛乳頃。精勤修習四無量心。四種法集。隨念三寶。波羅蜜多。及能勝解甚深空性。無分別住。於淨尸羅。起防護心。於菩提分。六度四攝。精勤修學。若能由此十種供養。供養三寶。應知是名圓滿供養。由如是等。興供養時。有六意樂。能於三寶隨一之所。少分思惟。而生無量廣大果利。一者無上大功德。田二者無上有大恩德。三者一切有情中尊。四者猶如鄖曇妙華極難值遇。五者三千大千世界獨一出現。六者一切世出世間圓滿根本。作是思惟。而設供養。此等是如菩薩地說而正摘錄。恆常時中。於如是等隨應而行。若遇佳節及大時會。當隨力能修妙供養。

復次恆須受飲食故。爾時若能首先供養無間缺者。少用功力。而能圓滿眾多資糧。故隨受用淨水以上。應以先首至心供養。此復非以糕之瘀處。菜葉黃處。是須擇其妙者而供。又供茶時。現一切人。如洒揚塵。唯彈少許。不成供養。是霞惹瓦語錄中出。譬如有一極肥沃田。至下種時而不下種。任其荒蕪。如是廢止。實生不忍。如是能生若現若後。一切善樂最勝福田。於其四季一切時中。常恆無間堪種。一切善樂種子。復應於此如經說云。「當以信犁。

耕耘福田。」若未能作至極堪惜。故如讚應讚云。「如尊之福田三世間非有施處尊第一是淨令座淨。猶如虛空界橫豎無邊際。於尊為利害異熟無盡際。」於最勝田尚不見如庸俗之田。此是我等無賢善相。故一切時當勤精進供養三寶。若如是行。由於勝田種善根力。於諸道次慧力增長。故於聽聞不能持文。思惟不能解義。修習相續不生慧力至極微劣之時。依福田力是要教授。如是亦如吉祥敬母云。「作詩大善根我慧依尊故。如夏季江河雖小極增長。」又如說云。「供養亦復不賴其物。是在自信。」若有信心用曼陀羅及諸淨水。並無主攝諸供具等。皆可供養。無餘財物應如是行。如現實有而不能捨。作是念云。「我無福德極貧窮。諸餘供財我悉無。」等同博朵瓦云。「於一穢螺盃中略擲少許香草。念云。『栴檀冰片妙香水。』是諸生盲欺明眼者。」又如樸穹瓦云。「我於最初供養香草。其氣甘美。現在供養。若沈水香。嘟嚕迦等。其氣香馥。」若於微供輕而弗供。則永生中終是唯爾。若縱微少。發起殷重。漸得上妙。應如此師行持修學。傳說此師每配一次。須用二十二兩金之香。若諸已得資具自在大菩薩眾。尚化其身為多俱胝於一身。復各化現百千等手。往一切刹。經無量劫。供養諸佛。諸由少許相似功德。便生喜足。云我

不於此上希菩提者。是於正法極少知解。造次亂言。以是應如寶雲經中所說而行。如云。「應當聽聞諸契經中所有如是廣大供養。廣大承事。由其最勝真實善心。增上意樂。迴向諸佛及諸菩薩。」

第三隨念悲故。亦應安立於諸眾生於是道理者。謂由悲愍。隨能安立諸餘有情令受飯依。

第四隨作何事。有何所須。皆當供養啟白三寶。棄捨世間諸餘方便者。謂隨作為何種所作。隨見何等緊要重事。應依三寶及興隨順三寶供養。於一切種。不應依止不順三寶邪道等儀。一切時中應當至心飯憑三寶。

第五由知勝利。畫二夜三勤修飯依分二。攝分所出勝利。二教授所出勝利。初中有

〔第五由知勝利：教授所出勝利〕原作科文，改為本文字體併入後文

二四聚。初四聚中。一獲廣大福者。如無死鼓音陀羅尼云。「佛世尊難思。正法亦難思。聖僧不思議。諸信不思議。異熟亦難思。」攝波羅蜜多論亦云。「飯依福有色。三界器猶狹。如大海水藏。非握能測量。」二獲大歡喜者。如念集中云。「若諸日夜中。能隨念諸佛。正飯依佛者。此是人所得。」於餘二寶亦如是說。我今獲得依止如是三寶歸宿。是為善得。

作意思惟增長歡喜。三獲三摩地。四獲大清淨者。謂由等持及以慧學而得解脫。

第二四聚中。一具大守護者。至下當說。二於一切種邪勝解障。皆得輕微或永滅盡者。謂由信解皈依惡師惡法惡友增上力故。造諸惡業。皆得輕微。當得清淨。三得墮入正行正至善士數中。四為其大師同梵行者。及於聖教淨信諸天愛念歡喜者。謂得趣入善士數中。為大師等之所喜樂。諸天如何歡喜者。謂彼歡喜唱如是言。我等由其成就皈依。從彼處沒來生此間。是諸人等。今既成就多住皈依。亦當來我眾同分中。

教授所出勝利分八。一得入內道佛弟子者。總有多種建立內外差別道理。然共稱許覺囉與寂靜論師。以有皈依而為判別。謂得皈依乃至未捨。是故最初入佛弟子者。須由至心於三寶所受為大師等。此若無者。任作何善。皆不能入佛弟子數。二成一切律儀所依處者。俱舍釋云。「受皈依者。是受一切律儀之門。」皈依七十論亦云。「近事皈三寶。此是八律本。」此中意趣。謂由皈依而能堅固涅槃意樂。從此意樂律儀發生。三先集業障輕微滅盡者。集學論中。顯示皈依能淨罪時。說云。「此中應以生豬因緣。而為譬喻。」謂有天子當生豬中。由皈依故。即未生彼。是由皈依能淨當生惡趣因故。「若有皈依佛。彼不往惡趣。捨

棄人身已。彼當得天身。」於法及僧亦如是說。故先集罪。有者輕微。有者罄盡。四積廣大福者。如前所說。五不墮惡趣。由前應知。六人與非人不能為難者。如經云。「諸遭怖畏人。多皈依山林。及皈諸園囿。皈所供樹木。其皈非尊勝。其皈非第一。雖依其依處。不能脫眾苦。若時有皈依。佛法及僧伽。由知苦苦集。正超越諸苦。八支聖道樂。當趣般涅槃。以智慧觀見。諸四聖諦理。此皈為尊勝。此皈是第一。由皈此皈處。能解脫眾苦。」此中應以成就風索外道等緣。而為譬喻。七隨一切想悉當成辦者。隨行何等如法所作。若先供養皈依三寶。祈禱成辦。則易成就。八速能成佛者。如師子請問經云。「由信斷無暇。」謂由獲得殊勝閒暇。遇皈依處。學殊勝道。由此不久當得成佛。如是憶念諸勝利故。於日日中。晝三夜三。勤修皈依。

第六下至戲笑乃至命緣。應當守護不捨三寶者。身命受用。定當捨離。若為此故。棄捨三寶。則一切生輒轉受苦。故任至何事。不捨皈依。作是念已。數起誓願。雖為戲笑。亦不應說捨皈依語。諸先覺等說一學處。謂隨往何方。於彼如來應學皈依。未見根據。

如是六種共同學處。是如道炬釋論中說。各別學處初三種者。契經中說。後三種者。出於皈依六支論中。如彼說云。「應於形像頌。及諸碎黃布。信解為大師。親口說諸法。不謗應

頂戴淨未淨諸人應觀為善士。」攝決擇中所說此等迦摩跋云「此諸學處內鄖蘇巴想亦宣說我二同從阿蘭若師所聞。」此語出於此師所傳壘跋疇道次第中。

若有違犯此諸學處當成虧損及棄捨之理者有說違犯六種成捨謂初三種各別學處及恆修皈依為命不捨供養三寶有說由其九種成捨謂加違後三種各別學處其餘僅是虧損之因然作是思若與為命亦不棄捨有違犯者實捨皈依如是雖未棄捨三寶然俱愛執三寶異品大師等三亦違不言有餘大師心未誠皈故亦成捨若未犯此僅違學處非是捨因。

是故皈依是於佛教能入大門若有皈依非唯虛言則是依止最殊勝力內外障緣不能違害功德差別易生難退倍轉增長故如前說由於怖畏及由憶念功德等門受持皈依勵力不違皈依學處是極扼要。

設作是念如是念死及思死後當生惡趣而起怖畏能從其中救拔皈處是為三寶若皈三寶不違學處然其皈處如何救拔如集法句云「能斷有箭道我教示爾等如來是大師爾等應須行。」佛是皈依大師僧是皈依正行助伴故正皈依是為法寶若能得此解脫

畏故。最下法寶。亦是由其初修業時。遠一分過。修一分德。斷證二事。倍轉勝進而為安立。非離此外。忽從他來。

故於此時。是須善巧善不善業及果差別。如理取捨而修正行。是為修法。若不久思二業及果。如理取捨。則不能遮諸惡趣因。縱畏惡趣。然亦不能脫此畏故。是故救拔果位惡趣。須於因時糾治其意。隨不善轉。此復依賴於諸業果得深忍信。

第二引發一切善樂根本深忍信中分三。<sup>一</sup>思總業果。<sup>二</sup>思別業果。<sup>三</sup>思已正行進止之理。初中

## 分二。正明思總之理。<sup>二</sup>分別思惟。

今初

初中有四業決定理者。謂諸異生及諸聖者。隨有適悅行相樂受。下至生於有情地獄。由起涼風所發樂受。一切皆是從先造集善業所起。從不善業發生安樂。無有是處。所有逼迫行相苦受。下至羅漢相續之苦。一切皆是從先造集不善而起。從諸善業發生諸苦。無有是處。寶鬘論云。「諸苦從不善。如是諸惡趣。從善諸善趣。一切生安樂。」故諸苦樂非無因生。亦非自性。自在天等不順因生。是為從總善不善業生總苦樂。諸苦安樂種種差別。亦從二業種種差別。無少紊亂。各別而起。若於業果。或決定相。或無欺罔。獲定解者。是為一切內